



Archery World Cup: Deepika Kumari-i bronze medal angu

Russia-i rara tembangtsü bilemba ya teimla tajung: Zelenskyy

NFHRCC ketdangpur tasen shimogo

Dimapur, May 11, 2025 (TYO): Nagaland Foothills Road Coordination Committee (NFHRCC) Executives tasen shimogo.

Convenor Chingden Konyak-i aniba Search Committee ajanga NFHRCC ketdangpur tasentem shim. Search Committee nung Anilo Rengma (Member Secretary) aser Renthungo Kikon (Member) na dena liasü.

Dimapur nung May 9, 2025 nü rondak senden ka ayonga amending Search Committee-i bener aruba osang agizüksü lemtet.

Iba senden nungsa NFHRCC nung Nagaland nungi kin ana-Tikhir Naga aser Indigenous Nagaland Garo nunger pelashishia agizüksü telemtetba agiogo.

Foothills road project ya 2013 küm NFHRCC ajanga shisateta tenzük anungji state sorkar ajak den Nagaland Historical road atema jembitsü senden nung adenertemi bangjemshio.

Tizit nungi Khelma tashi Nagaland Foothills Road Project (Trans Nagaland Expressway) inyakba nung NFHRCC-i maneni tenük yoktsü aser Peoples' Road tangatetba melenshiba magizüksü ta senden nungsa bangjemtepogo.

Changpang Area Committee on Foothills Road Project (CAFHRCC) aser Sumi villages, Baghty Division [Wokha District] dena Bhandari & Changpang Circles den joint consultative meeting ka

amending 2013 nung Foothills Road Project Original alignments agizükba ama dang inyaksü bangjemtep.

Foothills Road Project Original alignments ya NFHRCC aser NPWD, R&B ajanga yanglu aser Nagaland nung kin 10-i pusema nungiter.

NFHR alignments atema Lotha Hoho-i lemteta aliba den June 4, 2024 nü Chief Engineer, NPWD, R&B dangi shidi züluba pusema nungiter ta NFHRCC-isa metetdaksü.

September 11, 2024 nü bangdak Concerned Department, NFHRCC aser Changpang Area Committee on Foothills Road Project ajanga joint survey asü dang minor need-based re-alignment asütsü mulungtepa lir ta parnokisa ashi.

Bhandari & Changpang Circles nung yimtsüngtem den Baghty Division nung Sumi Villages-i NFHRCC pusema nungitba metetdaksüogo ta Media Cell, NFHRCC-i sangdong ka nung ashi.

NFHRCC ketdangpur tasentem:

1. *Convenor : Supu Jamir*
2. *Co Convenor : K.Himahito Chishi*
3. *General Secretary: Chenithung Humtsoe*
4. *Asst.Gen. Secretary : Yanger Angh*
5. *Publicity & Information Secretary : Iteichu Zeliang*
6. *Finance Secretary: K. Mar Lemtur*

CSU-i NHIDCL, M/S Ratna aser sorkar gari ajak noktanger

Dimapur, May 11, 2025 (TYO): Chakhesang Students' Union (CSU)-i May 12, 2025 anepdang 6:00 ako nungi NH-29 nung NHIDCL, M/S Ratna, aser Government-registered vehicles mesenzüdaksütsü osang metetdaksüogo.

Talisa iba tenokdangba ya Chakhabama-Kikruma Package II nung akangkanga alitsü ta CSU-i ashi.

CSU-i October 16, 2024 nungi May 11, 2025 tashi ita trok tema NHIDCL aser EPC contractor, M/S Ratna Infrastructure Project Private Limited nem Chakhabama-Kikruma Package II project inyaksü mapang peria dang agütsüogo.

Ajisüaka NHIDCL aser M/S Ratna ajanga parnoki nangzükba ama mapa meinyak aser senzusenbongertem nem timtem jenti agütsüogo. May 2, 2025 nü anogo tenet züngzüksü aser

May 10, 2025 nü timi lungkak aitiba sentong ka agi saka NHIDCL aser M/S Ratna nungi telangzüba tajung mangu.

Iba jagi CSU-i May 12, 2025 anepdang nungu NH-29 nung aser talisa Chakhabama-Kikruma Package II nung NHIDCL, M/S Ratna, aser sorkar gari mesenzüdaksüi noktangtsü telemtetba agiogo.

Chakhesang Students' Union (CSU)-i May 10, 2025 nü National Highways and Infrastructure Development Corporation Limited (NHIDCL) aser EPC Contractor M/s Ratna Infrastructure Project Pvt. Ltd. anema lungkak aitiba sentong ayongzüka agiogo.

NHIDCL aser EPC Contractor ajanga two-lane National Highway Kohima-Jessami Road (Package 2) mapang shitak nung meyangluba aser anepalu masüba atema CSU-i iba sentong ayonga agi.

Operation Sindoor mapang kiralongrar 100 tema tepsetogo



May 11, 2025 nü Indian Army tongti ketdangsürtemi osangbener senden ka nung Operation Sindoor indang osang lemsatepdang agiba noksa ka angur.

New Delhi, May 11, 2025 (Agencies): Operation Sindoor mapang Indian Army-i kiralongrar 100 tema tepsetogo aser parnok rongnung tongti tanishirtem densema liasü.

Pakistan aser Pakistan-occupied Kashmir (PoK) nung Operation Sindoor kübok kiralongrar tesepe 9 amak.

Jammu and Kashmir kübok Pahalgam nung kiralongrartemi civilian 26 tepsetba tayang küpzüka Indian Army-i Pakistan nung kiralongrar teseptem amak.

"Yusuf Azhar, Abdul Malik Rauf, aser Mudasar Ahmed nunger densema kiralongrar 100 tema tepsetogo. 1999 IC-814 hijacking aser 2019 Pulwama terror attack nung shilem agirtem tepsetogo" ta Director General of Military Operations (DGMO) Lieutenant General Rajiv Ghai-i Deobarnü ashi.

India-i mapang talangka Jaish-e-Mohammed (JeM) tanishisang Maulana Masood Azhar kinungtsü adianu Yusuf Azhar bushia aru.

Yusuf Azhar-i Indian Airlines

flight IC-814 hijacking nung shilem agi aser iba ajanga 1999 küm India-i Masood Azhar chiochtsüsa aküm.

Yusuf Azhar-isa Jammu and Kashmir nung kiralongrar nem training agütsü aser maparen inyakba nung yaritep.

Abdul Malik Rauf ya Lashkar-e-Taiba (LeT) nung senior commander ka liasü. United States ajanga pa ya global terrorist ta sangdonga lir. Külen, Mudasar Ahmed ya Markaz Taiba nung LeT central headquarters tekolakba liasü.

"Kiralongratsü tasa atonga inyaktertem aser sentong yanglurtem merenshitsü nükjidong nung Operation Sindoor inyak. India-i cross-border terrorism anema akangkanga raratsü" ta Lieutenant General Ghai-i ashi.

"Muridke amala tesem ajanga Ajmal Kasab aser David Headley ama global terrorists adokdaksüogo aser iba jagi onoki iba tesem tongti süa amak" ta DGMO Ghai-isa ashi.

Indian Air Force (IAF)-i Pakistan lushi nung Bahawalpur aser Muridke nung terrorist training camps amak ta Air Marshal AK Bharti-ia tanü metetdaksü.

"Onoki target system analysis asüba sülen air-to-surface guided munitions khaloktsü" ta pai ashi.

India-i May 7, 2025 nü Operation Sindoor tenzük aser kiralongraba anema zero-tolerance policy inyakba sayuogo.

Indian ground forces-ia Line of Control nung Pakistan nunger noktangtsü atema mapa inyak. Line of Control nung Pakistani sepai 35 nungi 40 shi khasetogo ta Lt Gen Rajiv Ghai-isa ashi.

"April 22 amakba sülen Indian Navy-i Carrier Battle Group, submarines, aser maritime aircraft ajak raratsü renema liasü" ta Vice Admiral Pramod-i ashi.

Pakistani drones aikati IAF bases amaktsü merang saka Indian defence systems ajanga lendong kecha melii drones ajak khasatsü ta Air Marshal Bharti-ia ashi.

May 19 nü Kuki-Zo MLAs aser CSOs senden amentsü

Imphal, May 11, 2025 (Agencies): Manipur Legislative Assembly nung Kuki-Zo MLA temi state nung sorkar tasen ka akümstü atema parnok Civil Society Organisations (CSOs) den jembishinü asütsü tebilemba metetdaksüogo.

May 19, 2025 nü Kangpokpi district headquarters nung senden amending Kuki-Zo MLA 9 aser Kuki-Zo CSOs aika adentsü ta Kuki MLA kati ashi.

May 4, 2023 nü nisung telok kati amakdang kanga mejungi yiruba BJP MLA aser taoba Manipur minister Vungzagin

Valte senden nung medentettsü saka pai pa melena nübo ka yoktsü akok.

Manipur nung February 13, 2025 nungi President's Rule benoka lir aser state assembly nung MLA temi sorkar tasen ka akümstü meranger, anungji iba senden ya Kuki-Zo MLA tem atema kanga tongtipang asütsü.

May 5 aser 6 anogotem Churachandpur aser Kangpokpi district headquarters nung BJP North East Coordinator Sambit Patra-i Kuki-Zo MLA tem den ajurutebpa sülen May 19 nü senden amentsü.

Sambit Patra-i Zoumi Council, Kuki-Zo Council, Community on Tribals' Unity (CoTU), aser tanga Kuki CSOs tanishirtem den ajuruteba sendentem menogo.

Kuki, Naga aser Meitei nungeri agizüktetba Chief Minister tasen ka shimtsü mulunga lir ta Kuki-Zo CSOs-i ashi.

Züngsem 60 agi akümbe Manipur legislative assembly Kuki-Zo MLAs 10 lir. Ajisüaka, tesüiba küm ana tashi parnoki assembly sessions asem nung medeni dang aruogo.

Senior Citizens Association of Nagaland ketdangpur tasen shimogo



Dimapur, Monupii/May 11 (TYO): Senior Citizens Association of Nagaland (SCAN) lokti senden May 9, 2025 nü Hotel Japfu, Kohima nung mena 2025 nungi 2028 kümsük atema ketdangpur tasen shimogo.

Mendenpurtem rongnung tir Dr. Pihoto I. Khala, tatong tir Limawati Longchar, tongti zülur

Tingshem Konyak aser joint secretary Dr. Watikala alitsü. Kimen ya Khevitto K. Shohe alitsü.

Executive nung Kelhousithie Kire, S.P. Francis, Dr. Neiphi Kire, Zuponi Ngullie, Dr. Thorhusie Katiri, Neiba Newmai, Dr. Seyieketou Angami, E.H. Lotha, C.R. Lotha, Kevi Liegise,

Dr. Khriezotuo Paphino, Tapi Semy, R.T. Asang aser Dr. Atha Vizol alitsü.

Maneni Advisors tem Dr. L.M. Murry, Dr. Kepelhusie Terhuja, Dr. Vinito L. Chishi, Dr. Khanlo Magh, Dr. R. Rose Chakhesang aser Ghunakha Swu aser odongtar K.K. Sema alitsü.

State tesem ajunga nung 2nd Quarterly National Lok Adalat 2025 menogo



Dimapur, Monupii/May 11 (TYO): Nagaland State Legal Services Authorities (NSLSA) kübok District Legal Services Authorities (DLSAs) ajanga state tesem ajunga nung 2nd Quarterly Nagional Lok Adalat 2025 agia sen 2,38,99,111 indang ken o balala 219 benteta liasü.

Iba anogo ken o 290 benoka jembir aser 219 bentetba nungi 192 pre-litigation stage nung liasü aser ken o 27 pending stage nung liasü.

Ken o ya timba bank loan recovery, Telephone bills, MACT aser danga consumer aser civil cases tem liasü.

National Lok Adalat dang 'People's Court' ta ajar aser ibai Alternative Dispute Resolution (ADR) lir, koba court backlog tajemba kumdaktsütsü, tajemzükba jenjang nung alir nem ochi obendang agütsütsü aser ken o balala mapang shidak nung senotsü kangabo meindoki bentettsü nükjidong nung amener.

Dimapur District Legal Services Authority ajanga 2nd National Lok Adalat ya Dimapur District Court premises nung ayongzüka liasü, kong N. Longshithung Ezung, NJS Chairman, Dimapur DLSA ajanga iba sentong indang rateta ashi aser Atoka Achumi, NJS, CJM cum Secretary, DDLSA

ajanga Lok Adalat teratet shia liasü.

Dimapur District Legal Services Authority nung panel lawyers ajunga conciliators liasü, kong pre-litigation cases 133 benoka 93 bentet aser pending trial cases 22 nung obendang agütsü. Parnoki sen 1,25,65,900 jenjang ken o benteta liasü.

Mokokchung DLSA ajanga 2nd Lok Adalat ya District Court nung y Julian Sithlhou, Chief Judicial Magistrate cum Secretary Mokokchung DLSA menden sür agia liasü. Iba mapang Bank loan recovery ken o 11 benoka jembir sen 9,86,735 indang ken o tembanga liasü.

Kohima DLSA ajanga iba sentong ya District court complex nung agi, kong presiding officer ya Duvelu Vero NJS, Principal District and sessions Judge & Chairperson, Kohima DLSA liasü aser Kohima DLSA panel lawyers tem conciliators ama liasü.

Iba mapang bank recovery cases 12, telephone bill recovery cases 13 aser MS cases 9 benoka telephone bill recovery cases 13, MS cases asem aser bank recovery cases 19 tembanga obendang agütsü. Iba mapang sen 2,23,69,327 indang ken o bentetja liasü.

Kasa anogo Zunheboto

DLSA-ia 2nd Quarterly NLA ya District Court Complex Zunheboto nung ayongzüik, kong sen 10,38,219 indang ken o benteta liasü.

Phek DLSA ajanga iba sentong ya SBI Chozuba nung ayongzüka SBI Chozuba aser NStCB Phek, Pfutsero aser Chozuba nung pre-litigation bank recovery cases 24 benoka jembir sen 26,04,401 indang ken o benteta liasü.

Maneni Kiphire DLSA ajanga 2nd Lok Adalat sentong ya District Court Complex Kiphire nung agia liasü. Iba sentong ya Holika Sukhalu, Chief Judicial Magistrate cum Secretary Kiphire DLSA lenisüba nung agi, kong SBI Kiphire branch aser Co-operative Bank nungia shilem agia liasü. Kiphire DLSA ajanga bank loan recovery ken o 10 benoka sen 5,70,370 jenjang ken o ti benteta liasü.

Longleng DLSA ajanga 2nd Quarterly National Lok Adalat sentong ya District court nung SBI Longleng den agia liasü. Iba mapang sen 84,157 indang loan recovery ken o pezü benoka jembir benteta liasü.

Kasa anogo Peren, Mon, Tuensang aser Wokha DLSAs temia 2nd Lok Adalat sentong ayongzüka agia ken o balala benteta liasü.

Angh-i Buddha Purnima benjong salem lemsatep

Dimapur, Monupii/May 11 (TYO): Temeshi Buddha Purnima benjongmung nung ni Lord Buddha nem akhum agütsür, shiba takum aser tesayuba ajanga nisung million aika tanü tashi ochi, temeshi aser tasüngtetba nung maneni len anir, ta Nagaland Angh La Ganesan-i sangdong ka nung ashi.

Iba anogo nung asenoki asen shisatsü aser maparen balala inyakba, lepa angutsü meimlai taochi sayuba aser asen dak

aser asen den müketa aliba alima nung yimjung mapa inyakba bilemtetti.

Shisatsü agi mashi-malu koktettsü, temeim agi tesempatep madak takok angutsü aser tangatetba agi timtem koktettsü Buddha-i sayuba nem asenok ajungmesodaktsüti, ta Angh La Ganesan-i ashi.

Nisung ajak temeim aser tanüla agi sünga Buddha Purnima amungtsü moatsür, ta sangdong ajangasa ashi.

Manipur police-i NIA indang most wanted suspect apu

Imphal, Monupii/May 11 (Agencies): National Investigation Agency (NIA) ajanga most-wanted suspect list nung züngoka aliba nisung ka Manipur Police indang special team kati puogo.

Iba nisungba ya state south tsütsü telungpur kanga bulua aliba tesem nung Honibar aonung menur operation agidang apu.

Iba nisungba ya arishi küm 27 tain Sagolshem Sanatomba Singh ta jangjaogo, shiba Thoubal district nung Thoubal police station jurisdiction kübok Wangbal Maning Leikai nung alir.

Itdangiter osang nung ajemdaker state police indang elite commando unitu ajanga ghonda ana operation agiba

mapang Singh ya miima aliba tesem ka nungi apu.

Singh ya ita aika ketdangsür dang jenshia senzua liasü aser NIA ken o ka nunga densema lir, ta police ajanga ashi. Pa apuba mapang police temi pa ket nungi SIM cards ana aliba mobile phone ka aser ozüing alema inyaksangshiba documents kar ngutet.

Standard protocol nung aliba ama temulung melemi alisang aser pa ket nungi ngutetba osettsüset ya tim ketdangsür nem agütsüogo.

Iba operation takok ngua agitetba ya state nung telungpur tebilemtsü aser mapa tamajung inyakba networks azüoktsü asoshi inyakba nung tongtipang mera ka alitsü.

Meghalaya lanuri wildlife sanctuary nung ecotourism project memulunger

Shillong, Monupii/May 11 (Agencies): Meghalaya nung aliba Nongkhylllem Wildlife Sanctuary nung ecotourism development project ka tenzüksü sentong yangluba atema lanur lokti kati kanga sashia anema nokdaker aser iba yagi ecosystem nung timtem agütsütsü ta ashir.

Hynniewtrep Youth Council (HYC) ajanga May 6 nü Meghalaya indang Additional Director General of Forest (Wildlife) aser Director of Wildlife Preservation nem shiti ka agütsü, kong parnoki Ri-Bhoi district kübok 29 sq. km sanctuary telungzüik aser temeket nung iba project inyaktsü sentong aliba agentsü ajungshia liasü.

HYC-i iba project anema nokdakba ya sen crore 23.7 jenjang project anemer telok tanabuba kumogo. Taoba mapanga Shillong nung amenoka aliba environmental group Green-Tech Foundation (GTF) ajanga State Tourism Minister Paul Lyngdoh dang infrastructure development project anema tezüluba agüja liasü.

Tawa Eco-Development Society of Meghalaya nem agütsüba project nungya raliwalir tem anisüngzüksü, glass skywalks, water sports arena aser danga tourist

facilities tem densema lir.

"Iba sanctuary nungya shiruru, ozü-sangnu, reptiles, insects aser süngdong-lidong balala asoshi talitsü tongtipang tesem agütsür. Yangji tourism inyakyim tenzüka ajanga iba wazüka aliba tesem indang ecology nung timtem agütsütsü," ta HYC tir Roykumar Synrem-i ashi.

Tourism dak sendakba projects tem yabo wazüka aliba tesem nung nokdangtsüla, ta paisa ashi.

Nongkhylllem Wildlife Sanctuary ya tila asünung infrastructure projects atema metemsü aser nisungi kanga ajema shilem agia iba tesem takok ngua ketdang asür, ta GTF chairman H.B.N. Nonglang-ia April ita osangbener dang shia liasü.

"Iba infrastructure project melen sorkari sanctuary temeket aliba nüburtem takum alitsü aser employment opportunities tali renloktsü asoshi senotsü lemzüksütsüla," ta pai ashi.

Iba sanctuary ya 1981 küm amenok, kong ozü-sangnu tabu 400 dak tema lir aser yangji tesamar aliba rufous-necked hornbill densema alir. 2021 Management Effectiveness Evaluation report nung Nongkhylllem ya northeast nung 'best-protected area' ta jangjatet.

PM-i defence ministry nung tongti ketdangsertem den senden amen



New Delhi, May 11, 2025: Pakistan aser India nati ceasefire atema bangjemba sülen anogo ka lir Amongnü New Delhi nung Ato kilonser Narendra Modi leniba nung Defence Minister Rajnath Singh, National Security Advisor (NSA) Ajit Doval, Chief of Naval Staff Admiral Dinesh K Tripathi, Chief of Air Staff Air Chief Marshal AP Singh aser tangartem senden amendang tangokba noksa nung angur.

New Delhi, May 11 (Agencies): India aser Pakistan nati ceasefire sangdongba sülen anogo ka lir Amongnü Ato kilonser, Narendra Modi-i defence ministry nung tongti ketdangsertem jaoka senden ka menogo.

Iba senden nungji Defence Minister Rajnath Singh, National Security Advisor (NSA) Ajit Doval, Chief of Defence Staff (CDS) General Anil Chauhan aser tri-services nung tongti ketdangser asem aden.

India aser Pakistan nati rara anentsü atema bangjemba sülen

Pakistan-i ceasefire alema inyakba dak sendakba nung Ato kilonseri tongti ketdangsertem dang tim telemtetba agia inyaksü metetdaksü.

Senden tembangba sülen Indian Air Force-i, "IAF-i Operation Sindoor nung onok nem lezmüksüba ama onoki shidak inyakogo," ta metetdaksü.

IAF-isa, operations maneni odar aser tesülen osang tejanga metetdaksütsü, ta ashi.

India-i, Pakistan-i ceasefire alema inyakogo, iba sülen India nunger sepaitemia tim meyiptsüdar, ta metetdaksü.

Honibar aonung osangbenertem den jembidang Foreign Secretary Vikram Misri-i, Pakistan-i ceasefire alema inyakbaji India-i süoki ia agir, ta metetdaksü.

Misri-isa, "Onoki Pakistan dang ozüing alema inyakbaji metongshitsü aser iba tensa ya süoki ia agitsü mepishir. Sepaitemi iba tensa ya junga mita repringdar aser Pakistan-i maneni International Border aser LoC nung ozüing alema inyakra parnok anema apusotsü atema sepaitem nem tetuyuba agütsüogo," ta metetdaksü.

Defense Minister-i BrahMos Production Unit ka semzüksüogo



May 11, 2025 nü Lucknow nung BrahMos Aerospace Integration & Testing Facility semzükba sentong nung New Delhi nungi video conferencing ajanga Defence Minister, Rajnath Singh-i 'Brahmand World Defence Update 2025' kaket sayatsüdag tangokba noksa nung angur.

New Delhi, Monupii/May 11 (Agencies): India aser Pakistan na tsüngda tensa mejungi aliba mapang ka nung Amongnü Defense Minister, Rajnath Singh-i New Delhi nungi video conferencing ajanga Lucknow nung BrahMos supersonic cruise missile production facility ka semzüksüogo, ta ketdangsertemi metetdaksü.

Kasa sentong nungjisa Union Defence Minister,

Rajnath-i 'Brahmand World Defence Update 2025' kaket-a sayatsüogo.

Production facility ji Uttar Pradesh Defense Industrial Corridor nung amenok.

Iba facility ji sen crore 300 indoka yanglu aser iba unit nungji küm shia BrahMos missile 80 nungi 100 tashi yanglutsü.

BrahMos missiles ya India aser Russia nati senteper BrahMos Aerospace mapatong

kübok yanglur. Iba missile ajanga kilometer 290 nungi 400 tashi nung target kongshitsü. Iba missile ya ali nungi, tzüym nungi mesüra anünglen nungi khatettsü.

BrahMos missiles dak alia tang tasen semzükba Aerospace Integration & Testing Facility nungsa küm shia next-generation BrahMos missiles 100 nungi 150 tashi yanglutsü.

Next-generation missiles touzükji seret 1,290 dang asütsü (tang aliba version bo seret 2,900 lir) iba denji külemi range ji kilometer 300 agi teimba asütsü.

Tang missiles tepungbaba yangluba ajanga Sukhoi ama raraba tayimtsütemi item ama missiles ji asem tashi bentettsü; tangbo missiles kaka dang benteter.

BrahMos Supersonic Cruise Missile project ya India nunger Defence Research and Development Organisation aser Russia nunger NPO Mashinostroyeniya na longjemer inyakba project ka lir. BrahMos ya India aser Russia na nung aliba ayong ana-Brahmaputra aser Moskva nungi agizükba nüngja lir.

BrahMos missiles ya mezüing 2018 küm March 22 nü tendanga liasü.

Mulungnen O



ASO :
May 22, 1923

ASÜ :
April 26, 2025

Late. L ASUNGBA

Ozü tsürabur Late. **LASUNGBA** Asangma Village, Mokokchung District, talangka shiranga aliba mapang nungi pa asüba anogo tashi, aser ibaji ajanga Onok molung zürepä aser taku marok ajemba tia ajurudang, nenok Kija, Kibong, Arogo, Yimten aser tenteta aliba Lokti balala nungi shinokisa Sarasadem den Shisatsü, Nubo aser Rongsen jenti agi tsüngdong arua yaritepogo, nenok ajak dang kanga dang pelar. Nenok arua atenba aser yariba agi ozü molung sungzükdaksü aser iba asoshi tepela tulu Kinungertemi ajak dang pelaba temolung taroktiba agi lemsateper. Nenok ajak den ajuruteptsü makok nung, Tsüngremi nenok ajak maneni maojangma ta ozüi sarasademtsür.

Aikati yaritepogo, saka Kija aser Lokti kar tenungteta kanga palaba lemsatepnur:

1. Shri. Metsübu Jamir, Hon'ble Minister, Government of Nagaland.
2. Shri. A. Pangjung Jamir, Hon'ble MLA & Advisor, Government of Nagaland
3. Shri. Tongpang Ozükum, Hon'ble MLA & Advisor Government of Nagaland
4. Shri. T.N.Mannen, Hon'ble MLA & Advisor.Government of Nagaland
5. Deputy Commissioner & Officers of Mokokchung District Administration
6. Officers, Dobashis & Staffs of ADC Office, Tuli & SDO (Civil) Office, Changtongya
7. Tuli Town Council
8. Adhoc Town Committee, Tzüdikong Town
9. Tuli Area Joint Council Forum
10. Ao Senden.
11. Watsü Mungdang, Mokokchung
12. Ao Kaketshir Mungdang.
13. Langpangkong Tzükong Mungdang
14. Langpangkong Kaketshir Mungdang
15. Asangma Rionsanger Putu Menden
16. Asangma Baptist Arogo.
17. Rionsanger Putu Menden, Kelingmen
18. Kelingmen Baptist Arogo
19. Kelingmen Kaketshir Telongjem
20. Tuli Town Ward Union.
21. Tuli Area Truck Owner Union
22. Rionsanger Putu Menden, Chuchuyimlang
23. Merangkong Village Council
24. Merangkong Senso Telongjem, Tuli
25. Aopenzü Village Council
26. Wameken Mejensanger Putu Menden
27. Rionsanger Putu Menden Kangtsüng
28. Kangtsüng Baptist Arogo
29. Wameken Yimsen Village Council
30. Kangtsüng Yimsen Village Council
31. Anaki 'C' Village Council
32. Anaki Yimsen Village Council
33. Anaki Old Village Council
34. Tuli Sub Division Badminton Association
35. Luyim Ao Baptist Church, Medziphema
36. Medziphema Asangma Senso Telongjem
37. Mendent & Lukongmendang Ward Committee, Tuli
38. KVK, Mokokchung
39. Tongpok Kidong
40. Pongen Kidong, Asangma

Temeim Kinungsü aser Late L. Asungba, Late L. Marinla aser Late L. Tinunuken Chimurtem, Semchirsemnurtem, Poinertem aser Anukapang aser Rabirtem.

May 7 nungi May 10 tsüngda Pakistan Army 35-40 shi süogo

New Delhi, May 11 metetdaksü.

(Agencies): Amongnü Indian armed forces-i 'Operation Sindoor' dak sendakba nung osangbenertem senden ka ayongzüka jembiogo.

Osangbenertem senden nungji Army nungi Lieutenant general Rajiv Ghai, Air force nungi air marshal AK Bharti aser Navy nungi vice admiral AN Pramod nungeri jembia liasü.

Lieutenant general Ghai-i, May 7 nungi May 10 tashi India nunger sepaitem den khatepdang Pakistan nunger sepa 35-40 shi süogo, ta

May 7 anepdang züngia India sepaitemi Pakistan aser Pakistan occupied Kashmir (PoK) nung kiralongrartem camp 9 amakba mapang nung kiralongrar 130 nungi 140 dak tali tepsetogo, aser parnok rongnung IC-814 hijack asüba nung shilem agir Yusuf Azhar aser Pulwama amakertem aika densema liasü, ta sepaitemi metetdaksü.

Indian Air Force-i Pakistan nunger tayimtsü aika khazüka yokogo, ta air marshal AK Bharti-i metetdaksü.

(Maneni tapak 8 nung...)



TIR YIMYIM YIMOBILEM (EDITORIAL)

DIMAPUR MONDAY, MAY (MONUPII) 12, 2025

America mulung sang !

Takoksa tuluka majurudang India o Pakistan na tsüngda anogo ishika rarar anenba ya ajak asoshi tajangzük aser osang tajung ka asütsü. Ajisüaka, Pakistan nungertemi koma bilemdar ashitsü makok saka India asoshibo US-i ashiba angaa rara anener ta asüba nungji rarabo junga raraogo saka mera maket anener. Aji oda, India o Pakistan na rara anenba osang India tangbo US-i tama metettsüsa aliba yimten tiaji, India ama ajaki akhümtsüba aliba lima ka asoshi tebilemdangtsü aketba mapa ka asütsü. Atangji, rara anendang ashi, kin ana tsüngda rara anenba tenangzüktepba aser tangatettep ken o renemba osang kecha mali ser Pakistan o India na tsüngda phone nung dang jembiteper ajaki mulungtepa anenogo, anungji yangji shinga takok aser tamakok anguba osang mali aser kin ana tsüngda yimjung nung lia aotsü asoshia tangatettep ken o kecha balaka renema ayuba mali. Aji oda, angazükba agi, India o Pakistan na tsüngda rara anentsüba indang jembidang, kecha tenangzüktepba ken o balala mayu saka tarutsü nung Pakistan tsütsülen nungi arua India nung kiralongraba mapa inyakra, ibaji India anema yimmakba mapa asütsü ta metetdaksü. Ajisüaka, aji terbang o dang lir. Aji oda, rarabo India o Pakistan na rara saka mangkobo America nungertemi bener arua mangkoterongi atu ama, India o Pakistan na rara nung takokerbo US kümogo. Tanü asenoki anganüyonga manganüyonga, BJP mesüra Congress ta mali, US-i ashi mangai alitsübaaji India asoshi tasak südi. Aji oda, tang Pakistan den hopta ana shi rarar külen US government-i rara anentsü mepishiba angaa anen süra, ashiko, US-i raratsü ajungshi nungbo tang tashi raraa lila na (?) ta bilemer. Tanübo, alima asoshi tia majung kin o kin na tsüngda raraba tensa tia nung yimjung o bener tetsüngdai aitsüsa United Nations (UN) dak tashi mali akümba angur. Atangji, ibajia tang talisa US nung Republican telok keti yimten yimsüsüba tashi arur külen Donald Trump-i UN maparen tongtibang aika nung shilem magitsü telemtetba agiba ajanga lir. Tangbo ibaji US asoshi takok tuluka amato parnoki bilema alitsüa akok saka ibaji kibong nung tambusü mazü tenu nunger ajak toktsür pei ajung dang bilema inyaker amato lir. Iba jagi US nem tajangzük masü takoksa dang bener arutsütsü, kechiyong tang putu ya alima kintema tashi temetet aser terenlok mapatem nung toktepa aienba putu nung alir, anungji mapang talangkabo US külen aser alima kintem ajunga külen ta serbo America moutettsü. Ashiko, tangbo Donald Trump-i kechisarina ajak America nung yanglur tangar dang ayoktsü ta bilema alitsüa akok, saka yangludena yur talir melira koda ? Aji oda, alima nung US ama kin katibo alima kintem telongjem nungi pilaa alitsübaaji mebilemi alima kintem telongjemji parnok shisatsü aser rongsen agi maneni anitsübaaji merangtsüla. Kasaji, India ama alima kintemi akümкета repranga aliba kin katia US-i kechi ashir ta masü saka UN-i kechi ashir ta asübaaji tongtibangba aser tashi taitba akümtsüsa inyaksübaaji kanga tongtibang asütsü. Atangji, pi kin kati kin ana raraya aliba anenang ta ashi nung anentsübaaji odangbo masü, yangji kin anaprongla asoshi tatidaksü mesüra tagitarutsü karbo alitsü. Ajisüaka, ibaji kecha mali ser ajungbena ka dang rara anenba nungji, rara anenbajibo junger saka rara anenba yimya nungji temulung malemtsü tuluka keta lir. Ashi, rara anenbaji dang masü saka asüng nungi India aser Pakistan yimjung nung lia aotsüsa US kuli südaksür UN sabang nung lemtetka asünungbo, India ama kin bulu asoshi kodaka mera taket mapa ka süla. Tangbo, India-ia aser Pakistan-ia US dang “nü mulung sang” ta shir rara anen amato alimai repranger. Iba jagi Pakistan-jibo toktsür India dena US aliba agi alir amai kümogo. Ajisüaka, shitakba nungbo tanü ama alima tesem balala nung kin o kin na raraba mapang ya India-i anir UN tashi itshidakja yimjung mapa inyaksü kanga nüngdaka kümogo. Iba nüngdakji India-i reprangtettsüla. Atangji, US-i inyakba amaji India-ia yimjung mapa inyaksü alima kintemi imlar, ajisüaka India kisüngibo meinyaktettsüa akok, anungji lai alima kintem ayongsemer külemi alima yimjung asoshi inyakra, shitakba, India-ang alima kintem madak lenir akümer asütsü aser idangjibo US-ia India-i kechi ashir ta tama angadangsüsa akümtsü.

OLEMSABANG

Asenoki meyokteba jembiba Ojang karh

~ T. Meren Paul, Kohima

(Yashi adok nungi...)

77. Tuyuyu - Inzüa anokshiba, monoknok anokdang ki, süngdong anokshiba
Tülahlah - Nepnep nepneper, temelem takang masü
78. Lasalasa - Tanemtanemi, tashi agi reponga masü
Melungi -Yakta masü, anüanüa
79. Tepulah - Sentsü mait matu, chiyungtsünung metsü mersü agi matu
Tejemja - Tebang dang telaset mali
80. Tesaksak - Chiyungtsü tangar dang nungi teimba angaka angaka achiba
Teroro - Shira aita ano aon junga mamendang yongi achiba
81. Mangsaa -Temang pasa süoshi kecha magi, züсах
Ashimelang - Khu kecha mebenloki mapa nungi kidangi shilangba
Ashisa - Kecha mebensüi teka tazüng aoba
82. Remsa - Tabenba sü longdener teperem naia nangri kanga mesüba
Sangkhu - Terongdong nung sü amloker tatembang pezüji tepoklen paiteba mesüteper yangku bulu kumdaksüba
83. Walunir -Lenir, nubur lenmang shidak nung anitsü akokba,
Samanir - Mezüngbur, shingaia mapeteti aliba tamasaba inyaksang, pioneer
Lensaner - Lemangsayua anir rogo, path finder
84. Ambong - Mapa bulu inyaksü apusodang,aremtsünleni aodang len anir tongtiba
Süsü - Arrshi aoba meyipa shilangdang tsükchir nokdangtsü tesüsa jajasang, rear guard
85. Tsükden - Oset tsüset ayutsü aser kongshi kongratsüLongmi agi sadem temer mimong temalen ka madak kaasemben alenlokyonga tur tsüngbang nung sendaklokba
Sazü/Hazü- Tsükden anasa mowa nung takong tara, chi, khu, muluk onketa, ehtaka ayutsü sadem ka alenlokba
86. Atsük - Nisung temang, talisa tekolak ku nung poktetba azü ajemba shiruru tila, lice
Kumtsü - Atsük tettsüdikobai ku nung entsü(arotsü) akor, adult lice
Arotsü - Kumtsüi ku nung akoba entsü temesüng, lice larvae
Teroror - Arotsü nungi rezükba atsük chanu, hatched lice
87. Azübing - Azü dak poktetba atsük, kobai bonga bonga jokteta aoer, tick
Menih - Yepden aser menden nung poktetba tematsük temeremso atsük tapu ka, bed bug
88. Tesasah - Pelashishia menürema sadoka jembishinüba
Telilih - Tebang mazüoki yakyakta tangar dang osang sangoktsüba
89. Atetapong - Tangari inyakba nung ashishiba
Nungsenbangsen - Tangar majungba ta,i meshidakba indang jembiba
90. Kümli - Taremsük shisatsü atapesatetba, countenance
Sakli - Tila teri ajak nung yakta dang mepelai akumba
91. Mitmuru - Maremsukteti kenkenlongpentsüngken pettetba ain adokba.
Ainapong - Mazüoktet teti dang rarabangsen kuptep yimya bener aliba
92. Anjilaksang - Antipong, Omechitepong anyu talak thalang kolepa alua aliba dang ajar.
Onkoloksongsü - Antipong, Omechitepong kolak nung shi mejongketa adokba; cockscomb
93. Teni - Tebangmechi temalen tenikijang ana koba agi tangu sashir aser menemteter; nose
Tene - Nashipongchi bulu tapu ana ajurutepdak tekongnem temaleni shi mejongteta adokba;
94. Azükasep - Süngdong azüklen aliba kongsang lepdokba, sepdokba
Azüktasep - Süngdong azük talaki melamelaa asepaasepa tutetba
95. Bangtzü - Tebang nungi yangzüka aluba tzü
Bangtsüh - Akih mapang zülupanglu maka, terbang agi jembizüka sentsü atsühba; credit
96. Pokchi - Tatalokba ochi o meyima meyui sapoka ashiba
Tsüngchir - Teyazü kodanga mejmbir, ochishir nisung
97. Meimmenah - Mapa meshidak tai inyakba agi senchi menji menazükba
Osümenah - Mekumdangi aibelena jembiba agi ken o menahzükba
98. Olaangla - Tetsur tekamapa, talisa südak mendak
Dakyadakgo - Yong msüra arü agi mulukondok, pakti adakba
99. Pangkobanglem - Tamatari, angooara, tepjitepjiir
Pangkongpangji - Tangar inyakyim amah mesüi inyaksangshiba, mashikoshi shisatsü
100. Bokdakradak - Chiyungtsu aika achiba
Bokdaklumi-Menua chi mechiyung nung yakta lumia adokba
101. Tebangyira - Aon tajung shi angoo medenra chi mechiyungtetba
Chira-Bangnang shinang masü chi mechiyungnüba; loss of appetite
102. Arabo - Shirangzükli tashi mait chi mejungnüba, mebangnangba mapang
Asürmo - Kinunger asüamaba sülen chiyungtsü kecha mejinüi tashi mait akumba
103. Yahlayahshi - Aika, talubusa peria akaba, kanga takar
Nanglanagnshi - Ajak nung anguba, talubosa anguba
104. Meyipa-arü - Tadongtsü tesem donger nüngdak mapa inyaker meyipa aruba
Shia-arü - Tadongtsü tesem medongi mapa merenemi shilangba
Shia-arü - Tasü nungi taküm dangi tanaben shilanga aruba, meyipa aruba
Shia-arü - Endoka aliba bena aruba.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Australian Defence Force-i Laishiba tasen ka sayaogo



First World War mapang sepai, Lance Corporal Phillip Davies indang Laishiba noksa nung angur. Pai pa tola nung iba Laishiba sema aliba ajanga tasü nungi kümzük.

May 11, 2025: Australian Defence Force (ADF)-i Laishiba tasen ka- New International Version (NIV) Bible sayaogo; küm 20 tejaklen 2005 küm parnoki mezüngbuba Lai adoka liasü aser tang agi tanabenbuba Laishiba tasen adoker.

Canberra nung aliba ADF administrative headquarters nung Laishiba tasenbaji saya.

Iba sentong nungji Bible Society Australia nungi Tina King-i Laishiba tasenbaji Defence Force nung tongti, Major General Sue Graham nem agüja liasü.

Iba sentong nung jembidang Graham-i, "Nüburtemi maneni Defence Force yariba aser Bible Society nungi volunteers-i nungita yariba atema onoki kanga pelar. Sepaitem, tzüyim nung senzürtem aser pilot tem ket nung Laishiba alitsüji kanga

China nung Khristan missionary tem sayutsüngitsü memelar

May 11, 2025: China nung maneni yimsü dak sendakba inyaksangshi nokdanga talisa Khristan missionary tem dang sayutsüngitsü aser training agütsütsü memelar.

Tawa China nung Communist sorkarisa Vatican dang nungi temelaba magii Catholic bishop ana shimogo, ta osang ka ajanga metetdaksü.

Tang China nung ozüng tasenba "Implementation Rules for the Administration of Religious Activities of Foreigners" benokba sülen Khristantem tekülem agiba, shisaliok agütsüba aser charity mapa inyakba nung bendangertem nem shilem magidaksütsü.

Kasa temzüng kübok bendanger missionary temi sayutsüngitsü, yimsü dak sendakba kaketterem alemtsü mesüra yimsü dak dak sendakba kecha inyaksangshitsü makok.

Iba dak alia bendanger missionary temi Bible studies ayongzüka magitetsü aser yimsü dak sendakba online sabangtem nunga shilem magitetsü.

Ano China nunger Khristan sensotemia bendangertemi ayongzüka yimsü dak

tongtibang," ta ashi.

Laishiba tasenba nungji ADF sepaitem atema sarasadem onüktem densema lir. Navy, Army aser Air Force sepaitem atema tapet sarasadem onük aika lir.

Tina King-i, "Iba kaket ya kaketnang nung ayutsü atema masü saka asenok anasa ayutsü kaket ka lir. Iba kaket ya tejen küma amshitsü, tongtibang tekongtem asü-a ayutsü, bushitsü aser sapua azüngtsü, ta onoki imlar," ta metetdaksü.

Kasa sentong nungji Bible Society Australia-i akhi jilushi ka sayaa Boer War mapang nung amshiba sepaitem indang Laishibatem sayu. Item Laishiba rongnung World War mapang Lance Corporal Phillip Davies taküm kümzükba Laishiba-a densema liasü. Belgium anasa Messines Ridge nung telephone cables atuba

mapang nung anasa bomb ana apok, aser iba bomb ji ajanga pa tetsüng aser teka yirua liasü. Davies-i pa tola nung Laishiba ka sema aliba ajanga pa tekubo meyirui pa taküm kümzükba liasü. Laishibaji sema maliasübo bomb apokba nungi 'shrapnel' jagi pa melungjang yirur lila.

Kasa sentong nungji Director General Chaplaincy-Army, Principal Chaplain Kerry Larwill-ia sepai ka taküm nung Laishiba koda tongtibang, iba indangji lemsatepa liasü.

Kasa sentong nung Military Christian Fellowship of Australia (MCF-A) aser Forum of Christian Military Ministries nungi aika dena liasü.

Laishiba tasenba nungji taoba mapang MCF-A patron aser taoba mapang Governor-General of Australia, General (retired) David Hurley-ia o semlok zülua lir.

ANOGO ABEN TSÜNGREM DEN

Rongsen timtem

"Aser Abram nashinüker O Lot nashinüker na raratepa adok" (Lipok 13 : 7).


Rongsen nung timtem aliba tetka tanga nung mali. Rongsen renlok dang kibong nung alir rongsen nung mangatettep adoker. Rongsen arendang temeim arenbaji kanga ajema lir. Lalushipong rongsenji tashiyim yipten ka akümer koba nung jabujari mejangba tashi itta kümdaktsür. Kechiaser morumoruji takok den lidaktsür. Taka tia aser sensak tia, anapronglai tanüla mokonga kümdaktsür. Morumoruji tongtibang masü yimya amuokba lir. Tenük meremji iba nungi adoker, aser nükmerem jagi rarabangsen ajungmesor.

Anungji rongsen jagi tatidangba tali adokdaktsür. Jungtepba jagi takaba renlok daktsür. Anungji tia tajungji tali kümdanga agizüktsü tenüngdaktsü. Asen Tsüngremi mi aketba lijakjang sepdaktsüba takok nok-o-nü asen nem agütsütsü.

Abrahami marakzüi Tsüngrem dak amang. Terotu nung raksatsüba lendong ajak nungi Kibubai pa kümzük. Pa rongsen renloktsü, saka aji pa taküm aser Tsüngrem tsüngda nung ambangyim agi amshitsü memela. Pa azükaruba mapang songjen pai tematiba akümbok nung jenok, aser tematiba aküm kübok ali.

Pa dang yamai shidi: Taküm aser rongsen ne temoatsütem lir. Nai mulungba nung alitsü aser amshitsü sayuang. Amen.

Pope Leo-i Gaza nung rara anentsü ayongzüük



Vatican, May 11, 2025 (Agencies): Pope tasenba, Pope Leo XIV-i pa Pope shimba sülen tanü (Amongnü) mezüng Vatican City nung aliba St Peter's Basilica balcony nungi lokti den jembidang Gaza nung rara anentsü ayongzüük.

Pa jakdang Pope inyaksang, asür Francis-ia mapang shia Gaza nung rara anentsü ayongzüükba den külemi anogo shia Gaza nung aliba Holy Family parish church den tongtepratepa liasü.

Amongnü St Peter's Square nung lokti den jembidang Pope Leo-i, "Gaza Strip nung tatalokbatem ajanga kü melung kanga yirur," ta metetdaksü.

"Tangsa rara anentsü atema ni ayongzüker. Nüburtem nem

teyari agütsütsü atema temelaba agüjang, aser tepuokdak alirtem ajak chiokang," ta pai ayongzüük.

Küm 80 tejaklen Second World War anenba bilemteta Leo-i tanü alima nung rara tapu ajak aitsü, aser item rara ya 'third world war tesem balala nung raraba lir" ta ashi.

Pope Leo-isa Ukraine nung yimjung atema ayongzüük.

"Ukraine nungertem timtem atema ni bilemtsür," ta pai ashi.

"Teti atema atangji yimjung tekeraba nung alitsü atema takoktsü ajak tekeraba nung inyaksüla. Tepuokdak alirtem ajak chioktsüla aser tanurtem pei kibongtem dangi meyipa yoktsüla," ta pai ashi.

Leo lokti matsüngdangi marudangyongi St Peter's Square nung nisung aika adenshia liasü.

Amongnü anepdang Leo-i St Peter leper anasa tekülem agi aser asür Pope Francis leper-a semdanga liasü.

Arrshi küm 69 missionary Brihostibarnü 267buba Pope shima liasü. America nungertem rongnungi mezüngbuba Pope ji pa lir.

AO OSHI ANGAZÜKDAK:**TANÜ ANGAZÜKTSÜBA OJANG****Temola**

(n) tetsüing temin sülen tetsü shilem (calf muscle)

* Temola nung tetsü timtem ya karbo somomo achiba agia anener.

Temopu

(n) tetsüing nung alilen tajemetba shilem (sole of foot)

* Temopu meyirutsü asoshi teti tsüngsem semer jajatsüla.



Tir Yimyim

OLONG PAITEP # 7148

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPIEN

2. Teburtemi tejak nung awaba
6. T ____ em
8. Tzüik ayudak
9. Nüngdakba dang timba
11. Züina ao
12. Yangi tzü angur
14. Tangar dang nungi tali
16. Senyong masü
17. Oadokdi
18. Tzü tarok
19. Yimtaklir aikati iba ya ki den külemi yanglusemer

-

(8)

-

(3)

-

(3)

-

(6)

-

(4)

-

(5)

-

(3)

-

(3)

-

(8)

LANGTSÜNGLEN

1. Temejangdak
3. Nisung ka mapa inyaksü nübo
4. Azüntsü asoshi mejemba
5. Tesangwa agütsüba
7. Tila masü
10. Tebenjem tetsü charu
11. Tekolak nung inok
12. Tetsüingda
13. Tangar inyakba ka inyak
14. Tim masü ta ashi
15. Asalendong
16. Tanü dangtsü

-

(6)

-

(4)

-

(6)

-

(5)

-

(4)

-

(6)

-

(6)

-

(5)

-

(4)

-

(4)

OLONG PAITEP # 7147 TELANGZÜBA**TIPIEN :**

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
5. Lenti, 7. Tajangzük,
11. Teronem, 12. Sempa,
13. Jahaz.

NAI-A YA METETTER MA

Latin America nung Avianca Cargo-i Mother's Day 2025 season nung alizüng tulu ka tongtetogo. 2025 Mothers Day mapang Avianca Cargo-i fresh flowers 20,100 tons tema belenogo aser iba ya yaküm dang nungi 15% agi teimba lir. 2025 Mothers Day atema parnoki Colombia aser Ecuador nungi North America aser Europe leni fresh flowers belena liasü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jeliae-mail : tiryimiyim@gmail.com nung yokang mesüra Tir Yimyim bureau tem nung agüjang.

Yashwanth-i Mizoram nung tenemkolak talangtiba tongogo**Aizawl, May 11, 2025**

(Agencies): Telangana nungi arishi küm 20 tain Bhukya Yashwanth-i Mizoram nung tenemkolak talangtiba Phawngpui tonga tutetogo.

Yashwanth ya Mahabubabad district nungi mountaineer ka lir aser pai "Har Shikhar Par Tiranga" ta ser linük ajungalen mission ka senzür.

India nung lanurtem dang drug abuse aser betting app addiction osang prokshitsü atema pai iba campaign agir.

Phawngpui dang "Blue Mountain" ta ajar Lawngtlai district nung tzüim nungi azüklen 2,157 meters talang lir. Myanmar arrtsü anasa aliba Phawngpui ya National Park ka

agizükogo.

Yashwanth-i Phawngpui kolak atongba züngsema state pungu nung tenemkolak talangtibatemi tuogo.

Pai Arunachal Pradesh, Tripura, Manipur, aser Rajasthan nung tenemkolak talangtibatemi tonga tuogo.

"Iba ya kü atema nüma atangba mapang ka lir. Iba summit nungi ni India lanurtem dang: 'Say No to Drugs, Say No to Betting Apps - Say Yes to Life' osang sangdoksür" ta Yashwanth-i ashi.

Tang tashi nung pai Arunachal Pradesh nung Mount Gorichen (6,858 m), Tripura nung Betlingchhip (930 m), Rajasthan nung Guru

Shikhar (1,722 m), aser Manipur nung Mount Iso (2,994 m) tekolak tashi tutetogo.

Pa indang alizüngji India kübok state 28 shia nung tenemkolak talangtibatemi tonga atutsüba lir.

Mizoram semdangdang Yashwanth-i Raj Bhavan nung Governor Vijay Kumar Singh den ajurute aser pa indang mission den pai ajangshia arubatemi lemsatop.

Yashwanth ya Bhuvanagiri rock climbing school aser Indian Himalayan Centre for Adventure and Ecotourism (IHCAE) nungi trained climber ka lir.

Pai Everest Base Camp, Nepal (5,364 m) aser Africa tallest peak, Mount Kilimanjaro (5,895 m), Tanzania dena international climbs 7 tashi temogo.

Yashwanth-i mountaineering dak alia NHFC Foundation India atema brand ambassador inyaker.

Yashwanth-i Meghalaya nung Shillong Peak talak tonga atutsü sentong lir.

Gauhati HC-i Arunachal sorkar dak tai tongloktsür**Itanagar, May 11, 2025**

(Agencies): Roing district hospital nung blood bank maliba den teyaritsü tim meyariba ajanga tetsür ka asüba atema Gauhati High Court-i Arunachal Pradesh sorkar aitsüogo.

Iba ya Lower Dibang Valley district nung Roing district hospital nung atalokba liasü. Justice Manash Ranjan Pathak-i state health department dang tetsürklar kibong nem Rs 2.5 lakh temenok agütsütsü tetuyuba agütsüogo.

2015 küm Roing hospital nung tanur asodang Miti Mega azü kanga yimdokba aser azü

manguba ajanga asü. Iba tatalokba atema Miti kinungbo tetsü Junaki Mega-i Gauhati High Court nung petition ka benoka liasü.

Roing district hospital nung blood bank ka ali aser trained emergency medical unit/staff ali asübo lar jabaso kinungtsü taküm kümzükla ta Junaki Mega-i GHC dang ashi.

Miti Mega ya severe anaemia agi timtema liasü aser Tirap district kübok Khonsa nung antenatal check-ups agia aru aser iba sülen Roing district hospital nung yaridaktsü ta GHC-i ashi.

Roing district hospital nung mapang shitak nung blood transfusion dena medical facilities magütsüba ajanga la asü ta GHC-isa obendang agütsüogo.

GHC-i Arunachal Pradesh Health and Family Welfare Department Commissioner & Secretary dang tasülar jabaso tenüng nung nationalized bank ka nung compensation amount agütsütsü tetuyuba agütsüogo.

Miti Mega-i July 10, 2015 nü tebur ka aso aser iba sülen la azü kanga yimdok aser severe anaemia o postpartum haemorrhage ajanga asü.

Manipur DGP-i Shirui festival maparen reprangshim**Imphal, May 11, 2025**

(Agencies): Director General of Police, Manipur-i Shirui Festival atema security maparen asadangtsü atema anogo ananü Ukhrul District semdangogo.

Shirui Festival ya May 20 nungi 24, 2025 tashi Ukhrul District nung amungtsü sentong lir.

Honibarnü DGP-i Superintendent of Police, Ukhrul Police Station (PS), Litan PS, 6th Manipur Rifles Battalion Headquarters semdanga liasü.

Pai district nung police ketdangsürtem den security senden ka amen aser Central Armed Police Forces (CAPF) o Assam Rifles ketdangsürtem den security dak sendakba onüktem lemsatop.

Maneni, DGP-ia sentong balala agitsü aliba tesemtem semdanga senzü.

Külen, Tribal Youth Council Manipur (TYCM), General Headquarters-i Festival 2025 atema Executive Committee dang budget lemsaa aliba reprangshitsü metetdaksüogo.

Iba budget nung local entrepreneurs, farmers,

indigenous products, aser disability-inclusive events amala enoksemtsü atema TYCM-i ayongzük.

Shirui Festival 2025 atema state sorkari Rs 6.30 crores lemsükja lir ta ketdangsürtemi ashi.

OFFICE OF THE**CHUCHUYIMLANG MERÜSHIBA ASOTSÜR TELONGJEM KOHIMA****TENÜNGSANG AGÜTSÜR**

Asür IMNACHUBA jala **TIAWAPANGLA-i** Department of Higher Education kübok Assistant Professor (English) B.ed. college nung mapa anguba atema MERÜSHIBA ASOTSÜR TELONGJEM, KOHIMA ajanga tenüngsang agütsür.

Tsüngremi la taküm aser wadang maneni moajangma.

Sd/-

Mrs. ALEMPOKLA
(President)

Sd/-

Mrs. IMKONGMENLA
(Secretary)

Russia-i rara tembangtsü bilemba ya teimla tajung: Zelenskyy



Kyiv, Monupii/May 11 (Agencies): Russia-i indang-indanga jembishinütsü maongka agütsüba nung Ukraine Tir Volodymyr Zelenskyy-i telangzüba agüja, Moscow-i rara tembangtsü bilemba ya teimla tajung ka lir, ta ashi saka ceasefire ya Hombarnü nungi tenzüksüla ta nenshia ashi.

Russia Tir Vladimir Putin-i aonung menur sangdong ka agütsüba nung Brehostibarnü "serious negotiations" nung shilem agitsü Ukraine jaokba sülen pai iba o ya langzüa liasü. Ajisüaka Ukraine tiri, "Asüng, May 12 nungi tenzüka teti asoshi ceasefire tejangja alitsü Russia-i jangjatsütsü imlar, aser Ukraine-i ajurutsü renema lir," ta ashi.

European lenirtemi anir Honibarnü Kyiv nung "coalition of the willing"senden ka amenba sülen Western linük temi Hombarnü nungi tenzüka anogo 30 atema rara anena atatsü ayongzüka liasü.

Russia-i 2022 küm tashi ajak amshia Ukraine amakba rara tembangtsü asoshi indang-indanga jembishinü masüdag ceasefire alitsüla, ta Zelenskyy den yariteper tongtipang nisung kati ashi.

"Mezüngbuba nung anogo 30 atema ceasefire, iba sülen tanünga ajak. Russia-i maneni raratsü tejangraba tebang o agi menembangtsüla," ta Andriy Yermak-i ashi.

European allies aser US nungi ayongzüka langzüa "Moscow-i jungjungba bilemdangtsüla, saka onok ajungshiba yabo menügdak," ta Kremlin odongtar Dmitry Peskov-i shia lir.

Putin-i sangdong ka nung, jembishinüba ajanga rara anena atatsü asoshi Russia aser Ukraine nati mulungteptsü ta meshitetsü, ta ashi saka anogo 30 atema ceasefire alitsü ayongzüka indangbo tejangja mashi.

Russia leniri taoba mapang ama jembishinü ya Turkey nung aliba Istanbul yimti nung alitsüla aser iba atema Turkey Tir Recep Tayyip Erdogan den Deobarnü pai jembitsü ta ashi.

Zelenskyy-i Deobarnep social media post ka nung, "Tatemsä Russia-i rara tatem kati arutsü bilemba ya teimla tajung lir," ta ashi.

"Iba atema alima ajunga mapang talangka nungi ataa liasü. Aser shidakba nung rara ka tembangtsü asoshi mezüngbuba meraji ceasefire lir. Anogo ka atema asüyonga tanen makai nisung tepsetba nung kecha tajangzük mali," ta pai ashi.

Honibarnü Ukraine tiri UK Ato Kilonser Sir Keir Starmer, France Tir Emmanuel Macron, Germany indang Chancellor Friedrich Merz aser Poland Ato Kilonser Donald Tusk nunger den ajuruteper aser parnoki Donald Trump den parnok sendong lemsatepa liasü.

Onoki tangsa ceasefire alitsü akhangba ya kechi südir süaka alitsüla, ta US tiria jangja-jangja shiogo, ta Sir Keir-i osangbener dang ashi.

Anüng, tziyim aser ali nung condition kecha makai anogo 30 ceasefire alitsü Putin-i memulungra Russia indang energy aser banking sector tem nung tenokdangba tesashi agütsütsü, ta Zelenskyy den osangbener senden ka nung pai ashi.

Ukraine nung sepaitem yutsütsü densema security guarantees den peace agreement akangshitsü nükjidong nung "coalition of the willing" telok tenzüka nung lenir pezü ya densema lir.

Senden amenba sülen Zelenskyy-i lenirtem dang Ukraine den nokdakba asoshi pelaba lemsatepa liasü.

Ajisüaka Europe nungi sangdong agütsüba ya asen tesendaktep asendenshitsü

merangtsü nükjidong ka masü saka rara mesünüba yimya nung lir, ta Peskov-i ashi.

Russia-i ceasefire atema jembi metenzükdang West-i Ukraine nem mitkar teyari agütsüba anentsüla, ta Moscow-i taoba mapanga shia lir.

Mapang tatsüka lir Putin-i Kremlin nung hall ka nung osangbener adenshia alidak sangdong ka agüja liasü.

"Ukraine armed forces tem nok-nü aser sepai tasen anguba sülen, aser tejangraba tulu nung ongken atuba aser command post tasen amenokba sülen masü saka mapang talangka yimjung asoshi ibai mezüngbuba mera alitsü," ta pai ashi.

"Shibai yamaji yimjung nüngdaker?"

Trump-ia Putin-i sangdongba ya Russia aser Ukraine asoshi anogo tajung ka asütsü, ta Truth Social nung ashi.

"Ibai ajak tasen aser kanga agi tajungba alima ka asütsü aser aji ataloktsü atema ni linük anaprong den maneni inyaktü," ta pai ashi.

Energy infrastructure anung amakba anogo 30 anena atatsü aser taoba ita Easter truce densema Moscow nungi ceasefire atema aiben asüngdangba nung Ukraine-i telangzüba magütsü, ta Putin-isa aitsür.

Ano Putin-i World War II bilemtetba den indangtepa April nung ceasefire ka alitsü sangdong. Iba ya Deobar ayatirm nung tembanga liasü.

Ajisüaka anogo asem ceasefire par sasa sangdongba ya Kyiv-i magizük aser ibai "theatrical show" ka lir ta ashi. Kyiv nung senden amenba ya anogo ka tejakdang Moscow nung Worl War II bilemteta sentong agiba nung linük balala nungi lenir 20 dak tema adenba nung telangzüba agütsüba ka liasü.

Bangladesh-i Awami League inyakyim nokdanger

Dhaka, Monupii/May 11 (Agencies): Bangladesh nung interim sorkari taoba Ato Kilonser Sheikh Hasina'er party inyakyim ajak tenokdangba agütsüogo. Hasina ya taoba küm kaketshirtemi anir longkak aitba sülen atsüngtoka liasü.

Nobel laureate Muhammad Yunus-i anir interim cabinet-i Anti-Terrorism Act kübok Awami League nem tenokdangba agütsütsü telemteba agi, ta Bangladesh indang law affairs adviser, Asif Nazrul-i ashi.

Longkak aitertem aika asüba dak sendakba nung International Crimes Tribunal (ICT) aser lenirtem anema International Crimes Tribunal (ICT) nung ken o benoka aliba mebentet tashi iba tenokdangba ya benoka atatsü, ta sorkarisa metetdaksü.

Awami League indang student wing, Bangladesh Chhatra League ya kiralongrar telok ka ta jatsüba sülen October ita tenokdangba agüja liasü. Parnoki longkak aitba mapang longkak aitertem amakba nung shilem agiba atema tenokdangba agüja liasü.

Tawa tentetba kaketshir party pusemertem densema longkak aitertem meyirejang aikati Awami League nokdangtsü khanga Dhaka yimtung nung anogo ishika longkak ait arudar.

Jamaat-e-Islami party indang student wing züngsemtemi iba longkak aitba nung kanga yakyaka shilem agidar.

Taoba küm July ita kaketshirtemi anir sorkar anema apuso aser iba sülen Hasina atsüngtok, shibai küm 15 tashi Bangladesh amokbanger sashisashia yimsüsüa aruogo.

Hasina aser lar sorkar anema hopta asem shi longkak aitba mapang nisung 1,400 tashi tepseta liasü, ta United Nations human rights office-i February ita metetdaksü. Hasina aser lar party nungi lenir tejentem aika nisung tepsetba aser tanga aibelen balala atema aitsür lir.

Ajisüaka Awami League koba 1949 küm tenteta liasü, parnoki iba tenokdangba agütsüba ya magizük aser parnok indang official Facebook page nung, ozüng alema tentetba sorkar telemteba ajak ya ozüng alema lir ta ashi.

Hasina ya August 5 nü nungi India nung jenoka lir. Lai linük toktsüba sülen longkak aitertemi la official ki dena maka liasü.

Iba ita tetenzüklen taoba PM Khaleda Zia, Dhaka-i meyipa aruogo aser iba ajanga election takaratiba nung agitsü atema interim sorkar nongshi tenzükogo.

Sri Lanka nung temeshi aine aoer 21 tsüksüta asü



Colombo, Monupii/May 10 (Agencies): Sri Lanka nung Buddhist nunger temeshi ainer aoer mena aliba bus ka longreni aiba sülen nisung 21 asü aser aika yiruogo, ta ketdangsürtem metetdaksü.

Iba bus ya Deobar anepdang tenem nung aliba Kotmale jila anasa tsükoka liasü. Iba tesem ya linük yimtiba Colombo nungi km 140 shi pilar lir.

"Nisung 21 süogo aser onoki asürtem maitsü jangjatsü merangdar," ta Deputy Minister of Transport and Highways Prasanna Gunasena-i local media dang ashi.

Iba tesem nung alirtemi gari tsükoker aliba nungi nüburtem aniteta mozükidangi anir mao asübo ano asür timba kümer lila, ta minister-isa shisem.

Television footage ka ajanga bus ya meküpoker aliba aser volunteer temi yirur alirtem nem

teyari agütsüba sayuogo.

Bus kilem aser tezülen panel shitokatok aser menden trokshi gari atem nungi shitokatoker liasü, koba süngolu ka nung gari tetsüng tekolaklen sür tsüka liasü.

Lendong nungi jenbor kati local osangbenertem dang ashiba agi, pa bus nung tejaklen mena liasü aser tiaka tilateri dang yirur jenboa liasü.

"Bus ya kola ka meyipba mapang tabelenleni manga ao aser gari anisangi gari mazüokteti longreni meküpoka ai," ta iba nisungba yagi ashiba video ka nung nguogo. Nisungba yagi pa tenüing magütsü liasü.

Bus ya state meyong bus compang indang liasü aser iba ya south len Kataragama pilgrim town nungi Kurunegala yimti-i oya aliba mapang iba lendong ataloka liasü. Iba tesem ana tsüngda km 250 shi lir.

2031 küm nungi FIFA Women's World Cup nung team 48 asayatsü

Monupii/May 11, 2025 (Agencies): Tebur asayamung ama tetsür World Cup-a 2031 küm nungi team 32 aliba nungi 48 kümstsütsü, ta FIFA-i sangdongogo.

FIFA Council-i asayamung nung team talila bendenloksü atema mulunga agizükogo, kechiyong tetsür football asaya tawa kanga kara renlokyonga odar, ta iba asaya achaayanga lokti tentet yagi ashi.

Team 48 asayaba asayamung nung group 12 alitsü aser asayatem 64 aliba nungi 104 akümtsü aser asayamung ya hopta ka agi talila asayatsü, ta FIFA-isa shisem.

FIFA tir Gianni Infantino-i ashiba agi, Australia aser New Zealand na nung Spain-i akokba 2023 World Cup kanga takok ngua asayaba sülen team timba bendenloksü telemtetba agiogo.

"FIFA Women's World Cup

2023 nung mezüngbuba confederations ajak nungi team temi asaya kakabo akok aser confederations pongu nungi team tem knockout stage tonga asayaba sülen tetoktepba jenjang tasen kati tuogo," ta Infantino-i ashi.

Brazil nung 2027 küm tetsür World Cup asayatsü aliba ya tetsür asayamung 10buba asütsü aser iba asayamung nungbo team 32 dang asayatsü FIFA-i tang tashi 2031 aser 2035 küm atema host dak sendakba nung telemtetba ka magi lir.

2031 küm asayamung ya United States nung asayatsü imlar, kechiyong asayamung ayongzüka asayatsü jangraba lemsateper parnok kija lir.

2023 finalists England densema United Kingdom-i 2035 küm tetsür World Cup ayongzüka asayatsü atema

bid südar.

"2031 atema bid ka agizükogo aser 2035 atema-bid ka agizükogo," ta Infantino-i taoba ita metetdakja liasü.

Tebur asayamung ya 2026 küm nungi team 48 asayatsü. 2026 küm World Cup United States, Canada aser Mexico nung ayongzüka asayatsü.

Hokolbarnü senden nung FIFA Council-i anti-racism dak sendakba nung jenjang tasen ka agia senchi timba kümstsüogo.

211 FIFA Council züngsemtem nem 75buba FIFA Congress atema metetdaksü, koba May 15 nü Asuncion, Paraguay nung agitsü lir.

Maneni FIFA Council-i, Afghan tetsür football asayatem nongita yaritsü atema tasa ka asaogo, kong Afghan Women's Refugee Team (AWRT) tentettsüba densema lir.

Archery World Cup: Deepika Kumari-i bronze medal angu



Monupii/May 11, 2025 (Agencies): India tsürtem rongnung takok tajungtiba ngur aliba archer Deepika Kumari-i Deobarnü Archery World Cup Stage 2 nung bronze medal ka nguogo. Semifinal nung temulung raksatsüka lai world No. 1 Lim Sihyeon mekoki liasü.

Küm ka tejakdang arishi küm 21 tain reigning Olympic champion yagi la Yecheon World Cup nung kasa state nung tsükdaksüba sülen taküma semifinal nung Korea tsürta yagi tetsür recurve kija asaya nung 1-7 agi koka liasü.

Ajisüaka arishi küm 30 tain India tsürta yagi bronze medal atema asaya nungbo Korea tsürsa Kang Chae Young, 7-3 agi koka bronze medal nguogo.

Deepika-i iba medal anguba sülen India nunger asayartemi iba asayamung nung medal trok nguogo, kong Honibarnü compound section nung medal pongu anguba densema lir. Madhura Dhamangankar-i medal asem tashi ngua liasü.

Bronze medal atema asaya nung Deepika-i kanga süngjema asaya aser semifinal

nung Lim makokba asaya dang nungi tactically tajungba asayateta liasü.

Mezüngbuba set nung asayar anapronglai point 27 angu, saka tanabuba nung set nung Deepika-i 28 ngua 3-1 agi la tejakdang aküm.

Kang shiba taoba mapang world champion k aser 2017 küm Berlin World Cup quarterfinals nung Deepika koker lir, lai tasembuba set 30-27 agi koka 3-3 aküm.

Saka set pezübuba nung India tsürta yagi pressure nung kanga junga asayateta point 30 angu aser iba set koka la 5-3 agi tejakdang aküm.

Asaya akoktsü atema tatemangbuba set nung draw ka dang nüngdaka asayaba mapang Deepika-i maneni kanga junga asaya-a 29-28 agi Kang madak takok ngua lai bronze medal angu.

Semifinal asaya nung Deepika-i asaya junga metenzüktet aser mezüngbuba set 26-27 agi makok. Tanabuba set nung tenapronglai point 28 ngua liasü. Iba sülen Lim-i set pezübuba 29-28 agi koka la final-i ai.

Pakistan tour atema Bangladesh-i telemtetba magi lir

Monupii/May 11, 2025 (Agencies): BCB-i sangdong ka ajanga linük tebur national team UAE den atakzüka aliba ama T20I asayamung asayatsü saka Pakistan den asayatsü aliba asayamungbo security dak sendakba asayatettsü masayatettsü mejangja, ta metetdaksüogo.

UAE den asayamung Sharjah Cricket Stadium May 17 aser 19 nü 7:00 pm local time nungi tenzüka asayatsü.

Ajisüaka Pakistan den T20I asayamung nung asaya pongu May 25 nungi June 3

tashi asayatsü aliba yabo mejangja.

India aser Pakistan na arrtsü nung mangatettep aliba ajanga board tebilemtsü akar. Iba mangatettep ajanga IPL aser PSL ta asyamung anaprongla thinentsüsa kümogo.

Sher-e-Bangla National Cricket Stadium nung senden ka amenba mapang board züngsemtemi ken o ajak asadangogo.

Ken o kanga junga sensak asema sülen BCB-i UAE den asayatsü aliba asayamung

lemteta aliba ama asayatsü telemteba agi, ajisüaka Pakistan den asayamungbo tensa apirang asayatsü asoshi ken o tembanga mejembi lir.

"Bangladesh National Team Pakistan nung oa asayatsü aliba asayamung atema Bangladesh Cricket Board-i Pakistan Cricket Board den maneni sensaksema arudar," ta board sangdong nung shia lir. "Onok asayatem aser staff tem teküzmükba kübok toktsütsüji ajak dang tongtibangtiba lir," ta kasa sangdong ajanga metetdaksü.

Salah aser Russo na nem Football Writers' awards agütsü



Monupii/May 11, 2025 (Agencies): Liverpool forward Mohamed Salah aser Arsenal striker Alessia Russo na nem men's & women's player of the season, Football Writers' Association awards agütsüogo.

Salah-i goal 28 idaktsü aser assist 18 süja Liverpool puri Premier League title abenba nung teyari agüja liasü aser Premier League nung asaya 38 asayaba mapang goal idaktsüba nung timba ben densemaba record ajateta liasü.

Egypt nunger asayar yagi Champions League nunga goal

asem idaktsü aser assist pezü süja liasü, kong Liverpool pur round of 16 tonga asayaogo.

Arishi küm 32 tain asayar yagi toba ita ano küm ana atema tenangzüktepba yanglushiogo.

FWA züngsem 900 dak temai vote agütsüba Salah-i shilem 90 ngua liasü, koba iba century nung vote timtiba anguba liasü.

Liverpool team-mate Virgil van Dijk tanabuba jenjang nung liasü aser tasembuba aser pezübuba nung Newcastle striker Alexander Isak third aser Arsenal midfielder Declan

Rice na liasü.

Salah ya Thierry Henry sülen iba naroküm asemenbuba anguba mezüngbuba asayar kümogo.

Kasa mapang nung tetsürtem rongnung Russo-i taoba küm iba award angula Khadija Shaw ajateta iba naroküm nguogo aser la ya iba naroküm anguba Arsenal nungi asayar tanabula kümogo.

England nunger striker yagi Women's Super League nung goal 12 idaktsü aser goal ana assist süja liasü. Taküm WSL nung Arsenal puri champions Chelsea point 12 agi memenepe lir.

Arishi küm 26 tain asayar yagi Arsenal pur Women's Champions League final tonga asayaba mapang asaya 14 nung goal ti idaktsü aser ana assist süja liasü. Parnok May 24 nü Lisbon nung Barcelona den final asayatsü.

Arsenal team-mate Mariona Caldentey tasembuba aser Chelsea defender Millie Bright pezübuba nung liasü.

INDIA OSANG :

Tapak 3 nungi...

May 7 nungi May 10 tsüngda Pakistan...

Operation Sindoor kübok India nunger sepaitemi tepsetba kiralongrartem rongnung Muridike nung aliba LeT headquarters nung tongti, Mudassar densema liasü. Pa asüpila sentong nung Pakistan army temi pa nem akhüm agütsü.

Pakistan army tongti, Asim Munir aser Punjab province CM Maryam Nawaz na tenüng nung Mudassar nem naro agütsüogo, aser iba kuliji India nunger intelligence ket nung lir.

"Pa den asüpila sarasademji sorkar school ka nung agi. Pakistan army nung Lt General ka aser Punjab Police nung IG kata iba

sentong nungji aden," ta intelligence ketdangser kati metetdaksü.

Ano Operation Sindoor kübok Lashkar-e-Taiba (LeT) kiralongrar telok den tesendaktep alir Abu Akasha alias Khalid-a tepsetogo. J&K nung kiralongraba tatalokba aika nung pai shilem agia liasü aser Afghanistan nungi raraba hadir shibelenba nunga pai shilem agia liasü.

"Pa asüpila sentongji Faisalabad nung agi aser iba sentong nungji Pakistan army nung tongti ketdangsertem aser Faisalabad nung deputy commissioner-a aden," ta Intelligence ketdangserisa metetdaksü.

BILEMDANGANG

"Pei dak aliba tai miimbanga yur tangar tai tebushi."